

E artistanan local Elvis Tromp y Edmond Tujeehut:

A COMBINA ESFUERZO PA PRESENTA UN EXPOSICION CU E TITULO "RASTRO"

Premiere dia 12 di September na Cas di Cultura

STA. CRUZ -- AruAnti Art Expo 2008 ta un proyecto cu ta consisti di un exhibicion di 30 pintura di e artistanan local Elvis Tromp y Edmond Tujeehut. E Exposicion aki lo habri na Aruba dia 12 di September den e sala di exhibicion chikito na Cas Di Cultura. E exposicion aki ya caba a ser presenta na Curaçao y tambe na Bonaire. E obhetivo principal di e proyecto aki ta, pa presenta imagennan atraves di pinturanan, cu lo enfatiza local cu Antianan Hulandes y Aruba tin den comun. E titulo cu a ser escogi pa e proyecto aki ta RASTRO. Usando e tema aki, e artistanan ta explora e conexon entre e islanan di Antiyas Hulandes y Hulanda atraves di e uso di color y visualizacion di e cultura di Antianan Hulandes y Aruba. Esaki

ta e prome edicion di AruAnti Art Expo, y e idea di e artistanan involvi den e proyecto aki ta, pa ripiti e exposicion aki anualmente. Ta e intencion tambe pa expande e proyecto aki den futuro door di invita otro artistanan for di e otro islanan di Caribe Hulandes pa participa den e siguiente AruAnti Art Exponan. E cover di e catalogue tin un significado special y a ser pinta door di e dos artistanan Elvis Tromp y Edmond Tujeehut. Esaki ta simboliza e cara di e proyecto, cual ta un trabao di arte combina di e dos artistanan aki. Un potret a ser saca di e pintura original pa recuerdo. Sinembargo e pintura original mes a ser corta den 9 pida. Cada sponsor principal di e proyecto aki lo ricibi un pida di e pintura unico aki y un potret di e pintura completo

despues cu e exposicion su tour termina. Esaki ta e forma pa trece dilanti na e publico, e tema di e exhibicion aki, cual ta cu tur pida poni hunto lo semper forma un imagen uni masha bunita. Esaki ta simboliza e visualizacion di e vision di AruAnti, cu ta: Nos tur ta parti di henter e universo y nos por semper bini hunto manera uno. Esaki ta un proyecto hopi valioso y sigur lo contribui na e avance di e intercambio cultural entre e islanan. AruAnti ta consciente cu esaki ta un proyecto hopi grandi cu lo trece e islanan mas serca di otro y lo enriquece e cultura di nos futuro generacionnan. AruAnti Art Expo 2008 a habri pa prome biaha na Curaçao, na Curaçao Museum na luna di April y a keda habri pa 1 luna eyan. . El'a habri na Bonaire, na Kas di

Arte na luna di Juni y a keda habri eyan pa un luna tambe. Awor a toca turno pa e gran exposicion titula RASTRO habri na Aruba. E premiere na Aruba lo ta dia 12 di September 2008 den e sala chikito di exhibicion na Cas di Cultura y lo keda habri te cu dia 19 di September 2008. E sponsornan principal cu a haci e proyecto aki posibel ta: Unoca, Prins Bernhard Cultuurfonds, Nederlandse Antillen en Aruba, Valero Refining Co. Aruba. Tambe a ricibi contribucion di Stichting "Fundacion Lotto pa Deporte". Un danki special ta bay na C&BM N.V., Fundacion mi Cutisa, The Curaçao Museum Foundation, Kas di Arte, y na tur esnan cu di un forma of otro a contribui pa haci e proyecto aki posibel y sigur uno exitoso. Danki!

